

Poslovanje novcem i ostalom imovinom preduzeća naziva se finansijsko poslovanje preduzeća, mikrofinansije, finansijski menadžment, poslovne finansije preduzeća ili samo finansije preduzeća.

Finansije preduzeća su znanstvena disciplina koja proučava zakonitosti, te pravila i načela poslovanja preduzeća novčanim sredstvima. Pod novčanim sredstvima preduzeća podrazumijevamo novac u originalnom obliku, koji je uložen u imovinu preduzeća i druge privredne subjekte ili finansijske institucije.

Zato se u finansijskom poslovanju preduzeća koriste razne metode i sredstva.

U finansijskom poslovanju preduzeće donosi tri važne odluke:

- 1) Odluku o ulaganju.
- 2) Odluku o finansiranju.
- 3) Odluku o dividendi.

Svaka se odluka uvijek usklađuje s ciljevima preduzeća, interesima njegovih vlasnika i menadžerima. Jedan je od značajnijih menadžera preduzeća finansijski menadžer. Od njega se očekuje da stručno priprema i samostalno u okviru dobivenih ovlaštenja donosi operativne i strateške finansijske odluke o investiranju, finansiranju i dividendama.

Sve tri odluke nisu jednakog značenja za ostvarivanje ciljeva preduzeća i zato se traži najbolja moguća (optimalna) kombinacija tih triju odluka.

Prva i najvažnija odluka je odluka o ulaganju, koja prethodi ostalim dvijema. Ako se radi o početnoj "start up" fazi malog preduzeća, vlasnik kao preduzetnik donosi odluku o osnivanju preduzeća u koje mora uložiti početni kapital, a zatim slijedi odluka o finansiranju.

Preduzetnik se pita kako pribaviti potrebna sredstva za finansiranje, odnosno kako realizirati odluku o investiranju. Nakon odgovora na ta pitanja, slijedi traženje odgovora na pitanja iz kojih izvora, kako, kojom dinamikom i uz koje efekte finansirati ulaganje.

Moj rad će se konkretno bazirati na finansiranju preduzeća hartijama od vrijednosti, gdje ću pokušati objasniti na koje sve načine jedno preduzeće može biti finansirano.